

# Goibekokale

ELGETA / Barikua / 2004eko urriaren 8a / 201. zenbakia

KOORDINATZAILEA: Irati Agirreazaldegia • Barrenkalea 33 20570 BERGARA • Tel.: 943 76 92 71 • Faxa: 943 76 29 77 • Posta elektronikoa: goibekokale@goiena.com • Lege gordailua: SS475/95

## Jabier Muguruzaren kontzertua izango da domekan Espaloian

IRATI AGIRREAZALDEGI

**Jabier Muguruza kantautore irundarrak kontzertua eskainiko du domekan, hilaren 10ean, Espaloia kafe antzokian. Emanaldia 20:00etan hasiko da eta bertan *Enegarren postala* diskoko abestiak kantatuko ditu akordeoia, baxua eta teklatura lagun dituela.**

Urteetan bere akordeoiarekin kontzertuak eman ostean, hainbat proiektutan parte hartu eta gero bakarkako bideari ekin zion Jabier Muguruza kantautore irundarrak.

Joxe Ripiau taldeko kide izan zen sorreratik taldea desagertu arte, eta bertan ere akordeoia jotzen zuen.

Kantautore moduan Boza barruan, Kitarra bat nintzen, Aise, Fiordoan, Hain guapa zaudete eta Enegarren postala diskoak kaleratu ditu. Disko hauetan kantuek Muguruza beraren eta Iñaki Irazu, Bernardo Atxaga, Xabier Lete, Joseba Sarrionaindia edo Inazio Mujika bezalako idazleen hitzak dituzte.

Baina bakarka ez ezik hainbat proiektutan ere jardun du beste musikari batzuekin. Besteak beste Bernardo Atxagaren obran oinarritutako Nueva Etiopia disko-liburuan hartu zuen parte eta baita Jackson Browneri egindako Cantame mis canciones omenaldi diskoan ere.

Euskal Herriaren bakarrik ez da jarduten Muguruza, eta besteak beste euskal kantagintzaren ordezkari izan da hainbat jaialditan. Musika kritiko eta adituek ere onenen artean kokatu dute kantari irundarra.

Idazle lanetan ere jarduten du eta haurrentzako liburuak eta narrazio liburuak kaleratuta ditu. Elgetako kontzertua

Jabier Muguruzak gaur egun musika eta literatura uztartuz dihardu lanean, beste hainbat proiektutan ere kolaboratuz. Enegarren postala kaleratu zuen iaz eta azken disko honetako abestiek osatuko dute Elgetako kontzertua. Jabier Muguruzak abestu eta akordeoia joko du eta Txema Garces baxuan eta Mikel Azpiroz teklaturan izango ditu lagun taula gainean.



ARTXIBOA

Jabier Muguruzak akordeoia jo eta abestu egingo du Elgetako emanaldian.

### ELKARTEAK

## Jabier Arantzeta presidente izendatu dute Ozkarbi elkartekeko urteko batzarrean

I.A.

**Ozkarbi elkartekeko urteko batzarra egin zuen joan zen astean eta kontuen balantzean egin ondoren, zuzendaritzako kide berriak izendatu zituzten, baita presidentea aukeratu ere. Jabier Arantzeta hartuko du kargua aurki.**

Urteko diru kontuen balantzea egin ostean, zuzendaritza taldeko kide berriak zein izango diren jakinarazi zuten Ozkarbi elkartearen urteko batzarrean, baita presidente berria aukeratu ere.

Guztira 12 lagunek osatzen dute zuzendaritza taldea. Iazko taldetik aurrean jarraituko dutenak Garikoitz Arrazola, Teresa Elortza, Jabier Arantzeta, Joseba Muxika, Iban Retolaza eta Iñaki Egizabal dira. Zuzendaritzan lekua orain hartuko dutenak, berriz, Jon Agirreazaldegia, Sebastian Arantzabal, Jose Luis Arantzabal, Celia Egizabal, Aintzane Sarasua eta Gaizka Bolinaga.


Jabier Arantzeta izango da urtebetez Ozkarbiko presidentea 24 boto jaso baitzituen eta Celia Egizabal, aldiz, presidente orde, 15 boto jasota.

### ASMOAK

Jabier Arantzeta iaz presidente orde izan zenez, badaki zuzendaritzako nondik norakoak berri.

Berak esan digunez, "ordena gailu bidez kontuak egitearena martxa onean doa, eta jendea gustura dagoenez, bide horretatik jarraituko dugu".

Hala ere, badituzte beste hainbat asmo. "Teilatua konponduko dugu, ahal dela Gabon aurretik. Bestalde, iaz estatutuak euskaratu eta hainbat aldaketa egin ostean, aurrean barne araudia berritzea da gure nahia", esan digu Arantzetak.



ARTXIBOA

Jabier Arantzeta.

### LABUR

#### Baserrietarako bideak garbitu egingo dituzte

Datorren astean hasiko da Udalaren aginduz kanpoko enpresa bat herriko baserrietara doazen bideak garbitzen. Baserri auzo guztietara joango dira langileak eta batik bat bide bazterretan pilatutako sasiak, belarrak eta gainontzeko zikinak kentzea izango da euren eginbeharra. Bide batzuek, ordea, ez dituzte garbituko Foru Aldundiaren ardurapean baitaude. Elgetan 60 baserritik gora daude eta hamar egun inguru behar dituzte lanak amaitzeko.

#### Gripearen aurkako txertoa hartu daiteke oraindik

Irailaren 20an hasi zen gripearen aurkako txertaketa kanpaina eta urriaren 29an amaituko da. Elgetako osasun zentroan esan digutenez, txertoa hartzeko aurrez txanda eskatzea komeni da Bergarako osasun zentroko telefonora deituta (943 03 54 00). Baina txertoa Elgetan bertan emango diete nahi dutenei. Kanpaina herritar guztiei dago zuzenduta, baina bereziki 65 urtetik gorakoek eta gaixotasun kronikoak dituztenek hartu behar dute txertoa.

#### Aixolarako bidean informazio panelak ipiniko dituzte

Foru Aldundiaren diru laguntzen bidez, herriko hainbat bide seinaleztatzeko aukera izango da aurki. Elgetan, Aixolarako bidean informazio panelak ipintzea erabaki dute. Guztira, hiru panel ipiniko dituzte, bat bidearen hasieran, betea Aixolan bertan eta hirugarrena Ermutik datozenek ikus dezaten, hango partean. Paneletan ibilbidearen krokisa, desnibela eta distantzia azalduko dira besteak beste. Zehazteke dago noiz ipiniko dituzten panelok.

ELKARRIZKETA

MIREN ARGI ZEZIAGA/MAALA GURASO ELKARTEKO PRESIDENTEA

# Aurtengo erronka Eskola Txikien Jaia antolatzea da

**I**railean egin zuten bilera Maala guraso elkarte kideek, eta bertan, besteak beste, presidente berria aukeratu zuten. Uri Gallegoren lekua Miren Argi Zeziagak hartu du eta elkarteko presidente izango da datozen bi ikasturteetan.

**Zu izendatu zaituzte guraso elkarteko presidente. Zein da elkartearen eginbeharra?**

Guraso elkartearen funtzioa eskolaren eta gurasoen arteko harremana koordinatzea da. Elgetan 2 urtetik 12 urtera arteko ikasleak daude eta gela bakoitzeko guraso ordezkari bat dago. Arazoren bat izanez gero ordezkari honengana joko lukete gurasoek. Bestalde, herrian egiten diren ekintza batzuetan hartzen dugu parte, bai antolatzaile modura, baita laguntzaile bezala ere. Zein ekintza antolatzen ditu elkarteak?

Guraso elkarteak zuzenean antolatzen dituen ekintzak Gabonetako eta Inauterietako merienda dira. Honetaz gain, eskolak

antolatutako beste hainbat ekintzatan parte hartzen du laguntzaile modura eta dirua emanez. Esaterako, gaztaina erre eta Santo Tomas egunetan edo ikasturte amaierako bazkarian. Gabonetan saskia zozketatzen dugu eta kantuan ere irteten dira umeak, baita Santa Ageda bezperan ere. Horrekin jasotako dirua eskolarendako izaten da. Gasturik handiena irteerarako antolatzen diren autobusetan egiten dugu. Zein dira azken urteotan egin diren lorpenik handienak?

Guraso batzuek bultzatuta eskolan jantokia jartzea, baita bi urtetik aurrerakoendako gela ipintzea ere. Jantokian gaur egun ume asko geratzen da bazkaltzen. Bestalde, gure lorpena ez bada ere,

*“Eskola gero eta dinamikoagoa da eta gurasoek begi onez ikusten ditugu berrikuntzak”*

aurten harreskola jarri da abian, eta hori gurasoendako oso positiboa da.

**Aurrerantzean zein asmo ditu guraso elkarteak?**

Erronkarik handiena Eskola Txikien jaia da. Horretarako guraso elkartetik aparte beste batzorde bat sortu dugu. Lanean hasi gara, baina herritar guztien laguntza beharko dugu.

**Eskolan egindako berrikuntzak nola ikusten dituzue?**

Psikomotrizitate gela da berrikuntza nabarmenena. Gimnasia gela txiki batean egitetik gela handi batera pasa dira eta psikomotrizitatean aditua den irakasle batekin gainera. Logopeda bat eta hezkuntza bereziko irakasle bat ere badaude. Ortua lantzerak ere joaten dira umeak... Eskola gero eta dinamikoagoa da urtetan aurrera joan ahala. Eskolaren lorpenak badira ere gurasoek begi onez ikusten dituzue.

**Zein behar sumatzen dituzue?**

Erakundeetako diru laguntzen beharra ekintzak eta irteerak egiteko. Bestalde, eskola ingurua txukuntzea, bankuak eta zakar ontziak ipiniz, esaterako.



GARRAIO PUBLIKOA

## Autobus zerbitzua sarri erabiltzeko dei egin du Udalak

**G**estio askoren ostean, Elgeta eta Bergara arteko autobus zerbitzu berria abian ipini zuten irailean, eta jadanik autobusen ordutegia ere zehaztu dute. Horretarako, herritarren beharrak hartu dituzte kontuan, bereziki, ikastera eta errehabilitaziora zein ospitalera joaten diren elgetarrenak.

**ZERBITZU BEREZIA**  
Ikasleen beharrak kontuan hartuta antolatu da zerbitzu berria: goizean 07:40an Bergarara joateko eta eguerdian 14:40an Elgeta-

ra bueltatzeko. Ibilbidean aukera dago autobusak Uberan eta San Juanen gelditzeko.

Ikasleek gain, gura duten guztiek erabil dezakete autobusa. Horretarako interesatuek udaltxerara deitu behar dute.

Bidaia baterako txartelak euro bateko kostua izango du, baina bonoa eginez gero, 0,90 euro ordaindu beharko dira. Bonoak bi motatakoak daude: hamar bidaiakoak, bederatzi euroren truke eta 30 bidaiakoak 27 eurokoak. Bonoen gaineko informazio gehiago udaltxean bertan emango diete interesatuei.

**UDALAREN ESKAERA**

Zerbitzua abian jartzeak ahalegin handia eskatu duenez, Udaletik zerbitzu hauek erabiltzera animatu nahi dituzte herritarrak. Izan ere, dauden autobusak erabiltzeak bakarrik ahalbidetuko du zerbitzua luzaroan edukitzea eta zerbitzu berriak antolatzea.

Udalarendako, ahalegin ekonomikoaz gain, apustua ere bada zerbitzuok martxan jartzea, eta herritarrek eurekin bat egitea nahi luke Udalak; horregatik elgetarrei dei egin diete Udaleko ordezkariak autobusa ahalik eta maiz erabil dezaten.



Elgetatik Bergarara joan eta bertan egiten dira gainontzeko herrietarako loturak.

# DANBAKA

DEBAGOIENeko I. MUSIKA LEHIAKETA

Parte har ezazu  
Goienak eta  
Espaloia Kafe Antzokiak  
antolatzen duten musika lehiaketan

Estilo guztiak ditugu gustuko, zuena ere bai!



# Indartsuago.

**Mundu-mailan estandar berri bat sortu da Espres-zerbitzuei, merkantzien garraioari eta logistikari dagokienez.**

DHL markapean bildu dira Guipuzcoana Euro Express, paketeen alorrean Europako buru dena, DHL Worldwide Express, aireko garraio espresentan munduko buru dena eta Danzas, aireko eta itsasoko zamen alorrean munduko buru dena. Honela arę hobeagoa den zerbitzu globala eskaintzeko. Modu honetan eskaintza, zerbitzu eta aukera gehiago jartzen ditugu zure eskura munduko 220 herrialde baino gehiagotan. Zure beharrak edozein direla ere, horiei erantzuna emateko prest gaude. Jar zaitetz gurekin harremanetan eta DHLren indar osoa izango duzu zure negozioaren zerbitzura.

**DHL Express Bergara**  
**San Juan Erreka 33**  
**20570 - Bergara**  
**Tel.: 943 763 642**  
**Faxa: 943 765 425**

MUNDUA MUGITZEN DUGU 